



ज्वजलपा वा:पौ

JWOJALAPA WEEKLY

दैं ७ ल्या: १७ (पूर्णडक ११९) ने. सं. ११३७ थिलाश्व पंचमी आइतवा: २०७३ मंसिर १९ गते आइतवा: (Dec- 04, 2016)

मू ८।- पृष्ठ ६

संविधान संशोधनय् नेवा: सरोकार छु धार नाप लिक्क लानाच्चन नेवा:त ?

ज्वजलपा वा:पौ /

संविधान संशोधनया नितिं सरकार संसदय् प्रस्ताव दर्ता यायेवं नेपा:या राजनीतिइ तरंगित जुयाच्चंगु दु । संविधान संशोधनया पक्ष, विपक्षय् नापं उलि संशोधन याना मगा: धइगु कथंया स्वंगू धारय् राजनीतिक शक्ति केन्द्रीत जुया वनाच्चंगु दु । सरकारपक्ष दलत आ:या संशोधन प्रस्तावं निकास विइगु दावी याना स्थानीय चुनावया तयारी तकं या:गु दुसा विपक्षी दल एमाले लगायतपाखें संविधान संशोधन याये दयइमुख धका: आन्दोलन यानाच्चंगु दु । अथे हे पहिचानया नितिं आन्दोलन याना वयाच्चंगु संघीय गठबन्धन संशोधन प्रस्तावय् व:गु जक संशोधन मगा पहिचानया आधारय् प्रदेशत निर्माण यायेमा: धका: माग याना वयाच्चंगु दु । थुगु कथंया स्वंगू धार मध्ये संशोधन प्रस्तावं थ:पनिगु माग पुरा मजुइगु जुया पहिचानया आधारय् नेवा:तयगु प्रदेश सुनिश्चितया माग लिवाक्क जूसां यानाह:गु दु । थ्व हे भूवलय् नेवा: स्वायत्त राज्य मंका: संघर्ष समिति मंगलवा: नेवा:तयगु प्रदर्शन याइगु जूगु दु । नेवा: स्वायत्त प्रदेशया माग याना प्रदर्शन यायेगु धका: धा:गु दु ।



थ्व हे भूवलय् नेवा: जागरण मञ्च संविधान संशोधन विधेयकय् नेवा: सरोकार क्यनेत शनिवा: यँया खुसिबुई च्वंगु नेपा: ब्याक्वेटय् विशेष ज्याभव: या:गु दु ।

उगु ज्याभवलय् नेवा: न्ह्यलुवा: मल्ल के. सुन्दर संविधान संशोधन सिद्धान्त कथं संघीयताया दुने जनतायात अधिकार विइगु नितिं मया:गु द्वपं वियादीगु दु । वय्कलं नेपालय् संघीयता छय् माल ? थ्व खं राजनीतिक पार्टीत स्पष्ट जूसां नं व्यवहारय् उकथंया संघीयता दुने जनताया अधिकार विइत मस्वयाच्चंगु द्वपं नं वियादीगु दु । मल्ल नेवा: अधिकार राजनीतिक रुपं सुनिश्चित यायेगु नितिं दकले न्हापां व्यक्तिवादी चिन्तनयात परि त्याग याना: नेवा:तयगु मागयात संस्थागत यायेमा:गु विचा: नं प्वकादिल । आ: ह:गु

संविधान संशोधन प्रस्तावं देय्या समस्या समाधान मजुइगु थ्व प्रस्तावं वरु देय्या राजनीतियात अझ गम्भीर समस्याय् लाकीगु विचा: प्वकादिसं नेवा:तयगु अधिकार सुनिश्चित यायेगु नितिं फुक्क पार्टी दुने दुपिं नेवा:त इमान्दार जुइमा:गु व नेवा: अधिकारया नितिं नेवा: नेतापनिगु ककस निर्माण याना: न्ह्यायेमा:गु विचा: नं वय्कलं प्वकादीगु ख: ।

नेवा: न्ह्यलुवा: डा. महेशमान श्रेष्ठ फुक्क नेवा: संगठनत थ्व इलय् कोमाय् वनेधुंकूगु विचा: प्वकादिसं नेवा: राजनीतिइ सक्रिय व्यक्तिपिं व इमान्दारपिं जाना: नेवा: केन्द्र निर्माण याना: नेवा:तयगु अधिकार कायेगु नितिं संघर्ष यायेमा:गु खँ ब: वियादिल । श्रेष्ठ संविधान संशोधनया विषययात कया: ५ ल्या: प्रदेशय् अतिवादी ब्रम्हत थ:थ:गु पार्टीया विचा:यात त्व:ता:



छप्पं जुयाच्चंगु खंयात उलादिसं वय्कलं नेवा:तयगु अधिकारया नितिं नं नेवा: नेतात नं उकथं हे पार्टी धका: मच्चंसे न्ह्य:ने वयेमा:गु विचा: प्वकादिल । उगु विशेष ज्याभवलय् संघीय समाजवादी फोरम नेपालया सह-अध्यक्ष राजेन्द्र श्रेष्ठ संविधान संशोधन फुक्क आदिवासी जनजाति, मधेसीपनिगु अधिकार सुनिश्चित यायेगु नितिं जुइमा:गु धासें १० गू प्रदेशसहित दूगु खाका ज्वना: संविधान संशोधन जुइमा:गु विचा: प्वकादीगु ख: । ज्याभवलय् नेपा: राष्ट्रिय पार्टीया सांसद लक्ष्मण राजवंशी नेवा: जनताया भावना छु ख:, उकियात थुइका: थ:पिन्सं संविधान संशोधनया खँ विचा: न्ह्यव्वयेगु खं तयादिसं फुक्क नेवा:तय् छवा: गुकथं यायेगु धैगु खँ च्यूता: कायेमा:गु विचा: प्वकादिल । माओवादी केन्द्रया नेता नेवा:

न्ह्यलुवा: दिलीप महर्जन आ:या संविधान संशोधनया प्रस्ताव माओवादी केन्द्रया प्रचण्डयात नं चित्त बुक्के मजु जुइ, वय्कलं फुक्कसित अधिकार विइ धका: धा:सां आ:या स्थितिइ थथे यायेमफूगुलिं गुलिफु उलि अधिकार विइत संविधान संशोधनया प्रस्ताव ह:गु विचा: प्वकादिसं नेवा:तयगु अधिकारया नितिं, नेवा: प्रदेश सुनिश्चितता या नितिं नेवा:त फुक्क छथाय् च्वना: निरन्तर संघर्षय् न्ह्यायेमा:गु विचा: प्वकादीगु ख: ।

नयाँ शक्ति नेपाल पार्टीया नेतृ हिसिला यमिं नयाँ शक्ति पार्टी पहिचान व सामर्थ्यया आधारय् संघीयता जुइमा: धैगु विचा: दूगु खँ कनादिसं फुक्कसित संविधान संशोधन याना: अधिकार विइमा:गु व थ्व अधिकार कायेगु नितिं आन्दोलन न्ह्याकेमा:गु विचा: प्वकादीगु ख: ।

नेपाल मानव अधिकार संगठन कीर्तिपुर शाखाको सूचना

विश्व मानव अधिकार दिवस सन १० डिसेम्बर २०१६ (२०७३ मंसिर २५ गते शनिवार) को सुवर्ण अवसरमा कीर्तिपुर वासीहरुको लागि सदस्यता वितरण भैरहेकोले नयाँ सदस्यता प्राप्त गर्न अनुरोध गर्दछौं । मानव अधिकारको सुरक्षा र सम्बर्द्धन गर्नु हामी मानवहरुको महान दायित्व हो, त्यसै कारण सच्चा नागरिकको हैसियतले राष्ट्र र जनताको सेवामा अधि बढ्न पनि हार्दिक अनुरोध गर्दछौं । साथै पुराना सदस्यता प्राप्त गरिसकेकाले नविकरण गर्नु भै सक्रिय सदस्यको परिचय पत्र ग्रहण गर्नु हुन अनुरोध गरिन्छ ।

सम्पर्क : नेपाल मानव अधिकार संगठन कीर्तिपुर शाखा कीनपा -१७

(सूर्य चन्द्रफार्मसी प्रा.लि. पाँगा, दोबाटो)

उपाध्यक्ष : श्री बच्चुराम श्रेष्ठ

सम्पर्क नं.९८४९६५३५१४

नेपाल मानव अधिकार संगठन

कीर्तिपुर शाखा



ज्वजलपा वा:पौ

सल्लाहकार

श्रीकृष्ण महर्जन

प्रकाशक:

नजरराम महर्जन

सम्पादक

श्रीकृष्ण तण्डुकार

ले-आउट:

ज्वजलपा डेस्कटप

संवाददाता

भरत महर्जन, निरजमान सिंह

थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweekly@gmail.com

सम्पादकिय

संविधान संशोधन, परिमार्जन व राजनीतिक ध्रुविकरण

न्हूगु संविधान कार्यान्वयन यायेगु नितिं संविधान संशोधन याना वनेगु धका: सत्तापक्षं पहलकदमि यानाच्वंगु अवस्था ख:सा उकिया विपक्षय् प्रमुख प्रतिपक्षी दल एमाले लगायतया पार्टीत न्ह्या: वनाच्वंगु दु ।

अथे हे संविधान संशोधनया प्रस्तावयात कया परिमार्जन याना थ:पिनिगु माग सम्बोधन यायेमा: धका: माग याना वयाच्वंगु अवस्था दु । थुगु कथं राजनीतिक पार्टीत ध्रुविकरण जुयाच्वंगु अवस्थाय् चुनावया खँ नं वयाच्वंगु दु । चुनाव धइगु संविधानयात कार्यान्वयन यायेगु नितिं ख: । अले चुनाव यायेगु ख:सा संविधान संशोधन मयासे याये फइगु अवस्था मदु धका: स्वयं सत्तापक्षं तायेकाच्वंगु दु । मेखे संविधानयात संशोधन मयासे यथास्थितिइ हे चुनाव यायेमा:गु स: तया संविधान संशोधनया विपक्षय् प्रमुख प्रतिपक्ष दल एमाले लगायत दलत दनाच्वंगु अवस्था दु । थुगु कथंया अवस्थायात स्वल धा:सा आ: संविधान संशोधन मयायेकं कार्यान्वयन मजुइगु खँय् धा:सा सुयां नं निगूमत मदये धुंकूगु दु ।

संशोधनयन सवलाय् धा:सा उलि अपुक सहमति जुइगु अवस्था मदु । उकिं थ्व इलय् राजनीतिक दलत गुलि ध्रुविकरण जुया वनाच्वंगु दु अझ नं अप्व: ध्रुविकरण जुया वनी अले अन्तत: छगू विन्दुइ थ्यंका सहमति याना न्ह्या: वनी धका: धायेछिं ।

गजल शौरभ शाक्यया

गजल-१०

नव:गु खुसि दु, गंगु तूं दु, ल:मदु

नेता दु, जनता दु, अयनं गनं स: मदु ।

शहर न्यंक, कंकिटया गू भयबिल

प्वा:या पुसा च्वनेत, गननं ग: मदु ।

मचात देस त्वता:, वनाच्वन विदेश

देशय् सिमाजक ल्यनाच्वन, ह:मदु ।

ह्युपाया किचलं, ख:गु ख:न्हाँ आसय्

आ:ला ख्वालय् सुयां, छपित् ज: मदु ।

गथे जुयावन कत:कत:, थ:गु ला हि नं

वैस वन थ:गु स्व:, न्ह्य:ने सुं थ: मदु ।



सानुराजा शाक्य

निक्व:गु विश्वयुद्ध धुंका: विश्वय् वाम लहरया चित्रण जुल । सोभियत संघ प्रभावित देय् जक मखुकि लोकतान्त्रिक चुनाव मार्फत नं यूरोपय् वाम विचारनाप सतिपि कथं कयात:गु समाजवादी पार्टीत चुनाव मार्फत सत्ताय् थ्यन । थुकथं समाजवादी विचार धारा पार्टीत न्यकभनं गनं आन्दोलनं गनं लोकतान्त्रिक चुनावया मार्फत त्याना वसेलिं उगु इलय् वाम विचारया लहर धका: चित्रण यात । थुकथंया वाम विचार धाराया लहर यूरोपय् जक मखुकि मध्यपूर्वया इरान, अफगानिस्तान, बर्मा निसं भियतनाम तक थ्यंगु ख: । नब्बेया दथुइ नं दक्षिण अमेरिकाय् उकथंया हे वाम लहर खनेदत । तर थौंकन्हे बुलुहुं वाम विचारया लहर दिना वन । थ्व हे सन्दर्भय् नेपालय् नं एमाले, माओवादी समेत चुनाव मार्फत सत्ताय् थ्यंगु यात वाम विचारया लहरया निरन्तरता कथं हे थुइकुगु ख: । तर नेपालय् वाम विचार ज्वना: त्या:पिं कम्युनिष्ट दक्षिणपन्थी जूगु आरोप दु । वाम विचारयात पनेत अमेरिकां विशेष भूमिका भित्तूगु विश्लेषण दु । आवरण वाम तर कार्यान्वयन दक्षिणपन्थी जूसेंलि थुकियात अमेरिकी रणनीतिया सफलता हे ख: धका: नं ध्वाथुइकल । अठ्चालिस लिपा नेपालय् एमाले मुख्यालय अमेरिका राजदूतया भ्रमणया भवलय् मार्क्स, एन्गल्स, लेनिन, माओ लगायतया तस्वीर सुचुका स्वागत या:गु चर्चा उबलय् खुब जुल । अर्थात उबलेनिसं एमालें वाम विचार त्याग याना: संसदीय व्यवस्थायात समर्थन याना: दक्षिणपन्थी लँपुइ न्ह्यात धका: कुँखिउगु ख: ।

थौं वया: नेपा:या केपी ओलीया नेतृत्वय् दुगु एमाले थौंकन्हेया व्यवहार व संविधान दयेकेगु मामिला निसं संशोधनया इलय् तक थ्यंबलय् एमालेयात दक्षिणपन्थी प्रभाव वामलाक त्वपुइधुंकूगु खनेदत । दक्षिणपन्थीतसं दकलय् ज्व:गु हतियार कथं राष्ट्रवादयात छयली ।

थौंकन्हे विश्वय् हे दक्षिणपन्थी हावा सरेजुयाच्वंगु खनेदु । भारतया मोदी, ब्रिटेनया ब्रेक्जितया पक्षय् वंगु मत, अमेरिकाया चुनाव व नेपालय् हे एमालेया कार्यनीति दक्षिणपन्थी दिशापाखें न्ह्यानावनाच्वंगु दु । दक्षिणपन्थीतसं छयलीगु राष्ट्रवाद राष्ट्रया नितिं स्वयां नं नश्लीय राष्ट्रवादयात प्रोत्साहित जुइगु कथं या: । गथे बेलायतय् यूरोपियन यूनियनपाखें बेलायत पिहाँ वनेगु निर्णय नं उकथंया हे राष्ट्रवाद हावी जुया जनमत खनेदत । भारतया मोदीया राष्ट्रवाद नं उकथंया खनेदयाच्वंगु दु । फतिफतले पाकिस्तान

दक्षिणपन्थी लहर

सत्तारुढ माओवादी केन्द्र व कांग्रेसया सरकारं सिमांकनया सवालय् आन्दोलनर त दलतसं माग या:थें संशोधनय् स्वीकार मयासे बरु ५ नं. प्रदेशया पहाडी जिल्लायात ४ नं. व ६ नं.य् ल्वाका नवलपरासीनिसं बर्दियातक थारु बाहुल्यता दइगु कथं सिमांकन संशोधन यायेगु प्रस्ताव हयेगु धयाच्वन ।

व चीनयात थ:गु देय् दुने शत्रुकथं चित्रण याना: उपिनापया शत्रुतापूर्ण व्यवहार या:गुकथंया नाटक मञ्चन याना: भारतीय जनताया मनमस्तिकय् मोदी व भाजपाया कमजोरीयात मखंछु पह: याकेगु स्ट्राटेजी भारतया मोदी सफल नं जुजु वनाच्वंगु खनेदत । उकथं हे अमेरिकाया नकतिनि क्वचा:गु चुनावयात विश्लेषण यायेबलय् नं थुकथंया हे अन्धराष्ट्रवादया हतियारया भरय् अमेरिकी मत रिपब्लिकन उम्मेदवार डोनाल्ड ट्रम्प कायेत सफल जुल ।

धाल्थेंया आदिवासी जनजातिया पक्षय् दनीगु राष्ट्रवाद मखसे आदिवासी जनजातियात दमन याना: सत्ता व राज्यय् प्रभाव दयेकेत सफल जूपिं जातीय समुदायया हैकमयात निरन्तर ता दइगु राजनीतिक वाध्यतायात हे उमिसं राष्ट्रवाद कथं जनताया मनमस्तिकय् छाप लाकेत सफल जुयाच्वनी ।

एमालें संविधान संशोधन देय् कुचा थलीन धका: थ:गु भातु संगठनयात आन्दोलन यायेत उज बिल । नागरिकताया सवालय् विदेशी (विशेष याना: भारतीय व नं विहारीतयूत) तयूत नागरिकता बिया राष्ट्रपति, प्रधानमन्त्री, प्रधानसेनापति दयेकेत्यन धका: संविधान संशोधनया विरोध याकी । एमालें ल्हवनाच्वंगु राष्ट्रवाद नितान्त पहाडी हैकमवादी राष्ट्रवाद उकि नं पहाडी ब्रम्हूतय् राज्य सत्ताय् हावी जुइगुया निरन्तरता दइगु संविधानया पक्षय् ख: । उकियात अपुक राष्ट्रवादया कभर तया बहुसंख्यक नेपाली जनता जक मखुकि पहाडी एकल जातीय राज्यसत्ता दमित जुयाच्वपिं नेवा: लगायत आदिवासी जनजातियात तक भ्रमय् लाका तथाकथित राष्ट्रवादया पक्षय् थनेत सफल जुइ । नेपा:या क्षेत्रीत हिन्दू राष्ट्रवादी स्वयां नं जुजुवादी जुइमा:गु ख: । तर क्षेत्रीत राजतन्त्रयात कभर यायेगु स्वयां नं हिन्दू राष्ट्रया सिद्धान्तय् राजनीति यायेत स्वयाच्वन । हिन्दू राष्ट्रया सवालय् पहाडी व तराईया ब्राम्हण जातितय् लगाव जुइमा:गु ख:

तर उपिं तुलनात्मक रुपय् क्षेत्रीत स्वयां म्हो जक हिन्दूवादी जूगु खनेदत ।

संविधान संशोधननाप स्वानाच्वंगु छगू मुद्दा धया:गु प्रदेशया सिमांकन नं ख: । आन्दोलनरत आदिवासी जनजाति, मधेसी दलतसं प्रदेशया सिमांकनया सवालय् उच्चस्तरीय पुन:संरचना आयोगयाया सुझावया लिधंसाय् न्यूनतम भिगू प्रदेशया माग यानाच्वंगु दु ।

तर वर्तमान संविधानं न्हयगु प्रदेश पारित यात । सत्तारुढ माओवादी केन्द्र व कांग्रेसया सरकारं सिमांकनया सवालय् आन्दोलनरत दलतसं माग या:थें संशोधनय् स्वीकार मयासे बरु ५ नं. प्रदेशया पहाडी जिल्लायात ४ नं. व ६ नं.य् ल्वाका नवलपरासीनिसं बर्दियातक थारु बाहुल्यता दइगु कथं सिमांकन संशोधन यायेगु प्रस्ताव हयेगु धयाच्वन । आन्दोलनरत दलयात स्वीकार मयानीगु मेगु हे खँ तर थ्व प्रस्तावयात एमालें दकलय् अप्व: विरोध यानाच्वन । थुकथं सिमांकन संशोधन याना: तयार जूगु न्हयगु प्रदेश धइगु संविधान जारी यायेगु नितिं निक्व:गु संविधानसभाया चुनाव धुंका: कांग्रेस एमालेया सरकार गठनया इलय् कांग्रेसया तत्कालिन नाय: सुशील कोइराला व एमालेया नाय: केपि ओली सहमति याना: सार्वजनिक या:गु न्हयगु प्रदेश हे ख: । तर थौं एमालेया केपि ओली व सुशील कोइराला सहमतिया:गु कथंया न्हयगु प्रदेश कथं हे सिमांकनय् संशोधन याये धका: धा:बले एमालें थुकीयात देय् कुचा: दली धका: विरोध याना: डबल स्टार्डडया खँ ल्हानाच्वन । उलिजक मखुकि थुकथं पश्चिमया थारु लागाजक स्वाका प्रदेश दयेकेबलय् देय् कुचा दली धका: थुकिया घनघोर विरोध याना: थारु जनता धाइपिं विखण्डनवादी धका: आरोप विइत्यंगु ख:ला ? पूर्व मधेसी बाहुल्यता जुइक समथर भूभागया मधेसी जिल्ला जक स्वाका दुई नं. प्रदेश दयेकेबलय् देय् विखण्डन मजुइगु तथ्य खँपिस पाँच नं. प्रदेशया सिमांकन संशोधनयात देय् विखण्डन जुइगु खंगु चस्मा मेगु मखु दक्षिणपन्थी विचार ओतप्रोत जूगु चस्मा कारणं जक ख: कि ?

भुखाचं पिडीत पांगाबासीपिन्सं नापी विभागय् ज्ञापन पौ लःल्हात

विभागया महानिर्देशकं समस्या समाधान गुलिफु उलि याकनं यायेगु आश्वासन

त्रिमुर्ति संगम/

किपू नगरपालिकां भुखाचं पीडित छें दुनावपिन्त सरकारं बिइगु क्वःछ्यूगु ३ लख तका राहत रकम छेंया लालपूर्जा दुपिन्त जक बिइगु धका: सार्वजनिक घोषणा यायेधुंका: वंगु सोमवा: भुखाचं पीडित पांगाबासीपिं किपू नगरपालिकाय् डेलिगेशन वंगु ख: ।

उगु डेलिगेशनय् किपू नपाया कार्यकारी प्रमुखं सरकारया नीति नियमय् च्वना: ज्या यायेमा:गु व लालपूर्जा दुपिन्त जक राहत रकम बिइगु खँ क्वःछी धुंका: मंसिर १७ गते शुक्रवा: पांगाबासीपिन्सं नापी विभाग केन्द्रीय ज्याकुथिइ वना: ज्ञापन पौ लःल्हा:गु दु ।

ज्ञापनपौ लःल्हाये धुंका: नापी विभाग केन्द्रीय ज्याकूया महानिर्देशक कृष्णराज विर्सी भुखाचं पीडित पांगाबासीपिन्त मा:गु व्यवस्था यानावी व छु छु समस्या दु व फुकक ज्यका बिइ धका: आश्वासन बियादीगु दु ।

महानिर्देशक विर्सी किपू लागाया नितिं नापी विभागं प्रतिनिधि खटे याना: भुखाचं पीडितपिनिगु समस्या गुलि फु उलि याकनं ज्यकेगु नितिं थौं हे प्रतिनिधि छुवयेगु खँ नं क्वःछिनादीगु दु । ज्ञापन पौ लःल्हायेगु भवलय् फुकक प्रमाण जुटे याना: नगरपालिकाया मार्फतं छेंया ४ किताया लिधंसाय प्रमाणीकरण याना: याकनं हे लालपूर्जा बिइगु खँ नं महानिर्देशक विर्सी प्रतिबद्धता प्वकादीगु ख: । वय्क:या धापू कथं भुखाचं दुनावंगु छेंत पुनःनिर्माण यायेवलय् सार्वजनिक



जग्गात अतिक्रमण मजुइमा धैगु मनसाय नं राहत रकम कायेत लालपूर्जा पेस यायेमा:गु प्रावधान त:गु खँया नं जानकारी उगु ज्ञापन पौ लःल्हायेगु ज्याभवलय् किपूया पांगाबासीपिन्त थुइकादीगु ख: ।

उगु ज्ञापनपौ लःल्हायेगु ज्याभवलय् पांगाया भुखाचं पीडित स्थानीय बासिन्दापिं लिसें थीथी राजनीतिक पार्टीया न्ययलुवा:पिनिगु नं उपस्थित दूगु ख: । उगु ज्ञापन पौ लःल्हायेगु ज्याभवलय् नेकपा माओवादी केन्द्रया दिलीप महर्जन, नेकपा एमालेया शरब महर्जन,

नेपाली कांग्रेसया पुकार महर्जन, बद्रिलाल महर्जन, नेमकिपाया प्रशान्त महर्जनलिसें थीथी कार्यकर्तापिं व आपालं पांगाया स्थानीय बासिन्दापिनिगु उपस्थिति दूगु ख: ।

ज्ञापन पौ लःल्हायेगु ज्याभव: क्वचायेधुंका: पांगाया स्थानीय बासिन्दापिन्सं नापी विभागया महानिर्देशक कृष्णराज विर्सी समस्या समाधान याना: याकनं कार्यान्वयन याये धका: आश्वासन बियादीगु दु, स्वये गुवले पू वंकी समस्याया समाधान, नापी विभागं नं आनाकानी यात धा:सा थुकिं मेगु हे नं रुप कायेफु धका: धा:गु दु ।

ज्यापु महागुथि किपू नगरसमितिया भिन्तुना ज्याभवलय् दीपा महर्जनया सफू विमोचन



ने.सं.११३७ न्हूदं व न्हयगां जात्राया लसताय ज्यापु महागुथि किपू नगरसमितिं म्हिग थिंलाख चौथि सनिवा: भिन्तुना कालविल ज्याभव: यात । उगु ज्याभवलय् मयजु दीपा महर्जनं च्वयादीगु “पांगाया विष्णुदेवी-बालकुमारी जात्रा” सफूया चिखिप्यने ज्या नं जुल ।

ज्यापु महागुथि किपू नगर समितिया नायो नजरराम महर्जनया नायोसुइ जूगु उगु ज्याभवलय् पाहाँकथं पांगाया सांस्कृतिक बाजं गुरु गोविन्द महर्जन, ज्यापु महागुथि

केन्द्रीय नायो लोककवि राजभाइ जक:मि व त्रिभुवन विश्वविद्यालय नेपालभाषा केन्द्रीय विभागया प्रमुख प्रा.डा. चन्द्रमान बज्राचार्य नं सफूया चिखिप्यने ज्या यानादीगु ख: । व धुंका: ज्यापु महागुथि किपू नगरसमितिया जीवका:छि ज: जुयादीपिन्त दसी पौ नं लःल्हाय्गु ज्या जूगु ख: । ज्यापु महागुथि किपू नगरसमितिया ल्यूछ्यानजे र ामभोला महर्जनं न्ह्याकादीगु ज्याभवलय् लसकुस न्वचु न्वकूर मेश कुमार महर्जनं बियादीगु ख: । नुग: खँ तयगु भवलय्

लोककवि राजभाइ जक:मिं थ्व सफू नं न्हयगां जात्राया धलखय् दुध्या:गु पांगाया विष्णुदेवी बालकुमारी जात्राया छगू लिखित दस्तावेजया रुपय् न्हयव्व:गु तसकं लसताया खँ ख: धयादिल । अथे हे प्रा.डा. चन्द्रमान बज्राचार्य त्रिभुवन विश्वविद्यालयया दराजय थाना च्वनीगु थेसिसयात सफूया रुपय पियथना ज्यापु महागुथिं बांला:गु ज्या या:गु न्हयथनादिसें थुगु सफू च्वयेगु नितिं मयजु दीपा महर्जनं तसकं मेहेनत या:गु व थ्व महज सफूया रुपय जक मुखे

थुकी धार्मिक, आर्थिक, सांस्कृतिक पक्ष व सामाजिक पक्षयात नं बांलाक दुवाला त:गु दु । सुभाब नं बियात:गुलिं थ्व सफूया महत्व दुगु खँ कनादिल । च्वमि मयजु दीपा महर्जनं थ:गु नुग: खँ तयगु भवलय् थ:गु थेसिसयात सफूया पियथने दया: तसकं लय्ता:गु व थथे हे हौसला बियादिल धा:सा हानं हानं मेमेगु विषयलय् नं दुयंक अनुसन्धान यायेत तिव: बिइगु खँ कनादिल ।

सभा नायो नजरराम महर्जनं गन गन नेवा:त दु अन अन जात्रा पर्व दयाच्वनी । तर व जात्रा पर्वया बारे छुं हे लिखित दस्तावेजत मदु ।

थ्व सफू पांगाया जात्राया बारे जक मखु न्हयगां जात्राया बारे नं न्हयथना त:गु नापं पुजा यायेगु विधि व गुथितय्गु बारे नं दुयंक वाला च्वयात:गु च्वछाये वह:जू । थ्व छगू दस्तावेजया रुपय पियंगु दु । कअथे हे थ्व छगू लिखित दस्तावेजया रुपय हथेदया: ज्यापु महागुथि किपू नगरसमिति तसकं लय्ता:गु व थथे हे मेमेगु सफूत नं पिकया वनेगु ज्यापु महागुथिया आजु दुगु नं कनादिल ।

सुधा महर्जनयात नागरिकस्तरं हनीगु



ज्वजलपा वा:पौ

नकतिनि जूगु विलियन्ट किड्स एण्ड टीन्ज २०१६ उपाधी त्याकेत ता:ला:म्ह किपू वडा नं.४ मानत्व:या म्थ्यायमचा सुधा महर्जनयात थ्वहे वईगु पौष २ गते सनि: चिलन्चो बिहारय सुथसिया ७:३० ता इलय् कि.न.पा.वडा नं ४ व वडा नागरिक मन्चया ग्वसालय् नागरिक स्तरं हनीगु जूगु दु ।

हिलटाउन उच्च मा.वि. खुगु ६ तर्गिं ब्वनांच्वंम्ह सुभा महर्जनयात हनीगु ज्याभवलय सकसितं ब्वना त:गु दु । सुया पाखें वयक:यात उपहार बिइगु इच्चा दुसा ९८४१३०१४१९ य् स्वाप् तयादिइत नं ग्वासा: खलकं इनाप याना त:गु दु ।

अनिच्चावत संखारा



जन्म:

२००८/१०/१



मदुगु:

२०७३/२/२९



मदुम्ह राममाया महर्जन

जिमि यःम्ह जहान राममाया महर्जन वंगु २०७३ जेठ २९ गते शनिवार आकाभाकां मत्यवं मदुगु थ्वहे मंसिर २९ गते सप्तमी तिथि खुला क्यंगु पुण्य तिथिसं मदुम्हेसिया सुखावति भुवनय् वास लायेमा धका: कामना याना श्रद्धाया स्वां देछना च्वना । जिमिगु दुःखया इलय् जिमित ग्वाहालि यानादीपिं, बिचा: हायेकादीपिं थःथिति, पासाभाइपिं सकसितं दुनुगलंसिं सुभाय बियाच्वना ।

जहान : रामबहादुर महर्जन, ट्यांगलाफाँट, किपू

काय/भौ :- राजेन्द्र महर्जन/सामना महर्जन

छय. :- रसान महर्जन

काय्/बुहारी :- रविन्द्र महर्जन/रश्मि महर्जन

छय् :-रोजलिंग महर्जन

मथ्याय्/जिलाजं :- रमिता महर्जन/किस्मत महर्जन

छय् :- अभिन महर्जन

हलिं नेवा: गुथि किपू कचां किपुली या:गु
“भिके-ल्ह्वने-न्हूधा: यायेनु”छुयों तया चिनाखँ गोष्ठी ब्वंगु चिनाखँ छसिकथं
पिकया वनेगु तातुना थ्व चिनाखँ न्ह्यव्वयागु ख:

५. न्हूधा: ज्वना देय् दयेकेनु

—अर्जुन महर्जन
शहिदपथ, पाँगा,
कि न पा ९

आहा गुलि बांला:गु थ्व देय् नेपा: भीगु
मधेस स्व:सा नसा नसाया धुकुतिं जा:गु
पहाड स्व:सा यक्व-यक्व पासि व जडीबुटीं जा:गु
अभ् उतर हिमाल ला च्वापुया च्वापुं जा:गु ।

छें, छ:ग:, फल्चा, सँभ्या: व तिकिभ्यालं जा:गु
तँतँपतिं पौ तया: न्यातपौतक तयात:गु
फ: त्वाथ: तजाय्क तया: अन हे मुने ज्यूगु
गुलिजक दुगु कला-कौशल
भी आजुपित्सं दयेकात:गु

सिद्धि वीम्ह गणेद्य: हं, खँ स्यनीम्ह ससमा:जु
ज्या स्यनीम्ह विश्वकर्मा, न्याय वीम्ह भैल: आजु
देशय् सुरक्षा यायेत कुमारी व देवीत तयात:गु
गुलिजक बांलाकक छ:पिं दुथ्याकात:गु

थां, खापा, तुनासितय्के कलाकौशल कियात:गु
चा:ह्यु वइपिं सकसियां ई वंगु हे
मचाय्क स्वये य:गु ।

आहा गुलि बांला:गु विश्व सम्पदाय् ला:गु
भीगु देय्या म्हसिकात ख: पुलांपुलांगु ।

२०७२ वैशाख १२ गुज्व:गु दसा भ्वखाय् व्व:गु
इमिथिगि ध्वारर(घुरुरु गुलि दुंगु गुलि स्यंगु
गुलि पौ मदु गुलि गजू मदु
छें फल्चा छ:ग: दुंगु
थ्व भीगु देय्यात तधंगु दसा व:गु ।

आपद्-विपद् जीवनय् वयाच्वंगु दु वनाच्वंगु दु
जीवनय् थाकु अ:पु जुयाच्वंगु दु वनाच्वंगु दु
भीपिं थाय्वाय् दयेकेत
छथ्री छप्पें जुया: गुलि मिलेजू
उकिं हे भीगु फुक्क सम्पदात दयेकेफुगु

ईव्य: धइगु हिलाच्वनीगु,
चा:हिला: आ: थन हे थ्यंगु
स्वयेनु सीकेनु गन गथे भीगु सम्पदा धइगु
दय्के म्वाकेमाल फुक्क सम्पदात पुर्खा दयेकात:गु
ज्यूगु पुलांगु ल्यंकातय्नु मज्यूगु न्हूधा: यानातयेनु

जक:मि, दक:मि, सिंक:मि,
सिल्पी भीपिं द हे दु ।
अ:पा, आय्पा, चा, सिं माक्व भीके द हे दु
ज्या यायेत मा:गु ज्याव: भीके सकतां दु
न्हूधा: ज्वना: न्ह्य:ने वनेनु, न्हूधा: ज्वना: देय्
दयेकेनु ।

अन्धविश्वासय् लिकुनाच्वंगु विज्ञान



नेवा: समाजय् थीथी
कथं संस्कृतिात दु अले
थ:थ:गु कथंया धारणा
दयेका वयाच्वंगु खने दु ।
संस्कृतिइ विविधता दुपिं
नेवा: समाज दुने थथे
याये मत्य: अथे याये मत्य
धका: थीथी कथंया
अन्धविश्वास ल्यनाच्वंगु
दु । अज्व:गु कथंया
अन्धविश्वास दुने
वास्तवय् विज्ञान
सुलाच्वंगु दु धका: पन्नार
त्त महर्जनं क्यानादीगु दु ।
वय्कलं नेवा: समाज नाप
स्वाका अन्धविश्वारय्
लिकुनाच्वंगु विज्ञान नांगु
सफू तकं च्वयादीगु ख: ।
व हे सफूपाखें निरन्तर
रुपं न्ह्यव्वया वयाच्वनागु
ख: – सं.

लाखय् धायेवं भीत येंया
बलय् वइम्ह लाखय् लुमना वइ
। ह्याउँक सँ फँ फँ व थपाय्
पा:गु ख्वा:पा दुम्ह लाखय् मिखाय्
भल भल लुमना वइ । थ्व छम्ह
सांस्कृतिक रुपं छ: मानय्
यानात:म्ह लाखय्या रुप ख: ।

मिप्वा: लाखय् थज्याम्ह
लाखय् मखु । थ्व मिप्वा: ज्वना
जूइ बाय् छयनय् तयाजुइ धाइ
। थ्व छ:तुयू बलय् बाय् न्हिनय्
पिहाँवइमखु धाइ । चान्हय् ख्युंसे
च्वनी बलय् जक खनी । थ्व
पिहाँ व:गु खनी बलय् गर:
क्यातुपिं उसाय् तकं मदयेय:
धाइ । थ्व पिहाँ वलकि भिं जुइ
धाइपिं न दु मभिं जुइ धाइपिं
न दु । सुयातं छुं मजूसा भिं
धाइ, छुं जुल धायेव लाखय्
पिहाँ व:गुलि जूगु धका: पा:
ल्यायेगु न याइ ।

मिप्वा: लाखय् पिहाँ वइगु
धयागु छुं अजू चाये मा:गु खँ
मखु । थ्व पिहाँ वइबलय् भिं
अथवा मभिं छुं जुइगु मखु ।
यक्व क्वय् ल्हानां च्वंथाय् चान्हय्
मिया ज: खनेदइ । थ्वयात हे
मिप्वा: लाखय् धाइगु ख: । थ्व
छगू विज्ञान सम्मत खँ ख: ।
ल्हानाच्वंगु क्वय् चना:
जिलं वन धायेवं थुकी थीथी
कथंया रसायण निर्माण जुइ ।
थज्या:गु रसायण मध्ये फसफर
स नं छगू ख: । थ्व ग्यासया
रुपय् विकास जुइ । चा, फि
आदि ल्हाना च्वनीगुलिं थ्व
विकास जूलिसे गालंच्वय्

पन्नारत्न महर्जन

थहाँवये फइमखु यक्व विकास
जुया: गालय् चाप अप्वल धायेवं
जक थहाँ वइ । थज्याबलय् थ्व
कसय् जुयाच्वनी । चां त्व:न्यात
धायेवं ल:ग्व:चा तज्याये थें जुया:
फसय् वनी । फसफरस व
अक्सिजन त्वाक ज्यातकि छगू
कथंया ज: पिहाँवइ । थ्वज: छ:
तुयू बलय् खने दइमखु । थ्व
विज्ञानं प्रमाणित यानात:गु दु ।
थ्व ज: मिजला थें जुइ ।

चंगु क्वचं फसफरस पिहाँ
वइगु थबलय् वइ अबलय् वइ
धयागु दइमखु । थ्व न्ह्याबलें
वयेफु । ग्यासया रुपय् वइगुलिं
थ्वयात खंके फइमखु । थ्व व
अक्सिजन त्वाकज्याना: वइगु
मिजलाया ज: नं न्ह्याबलें
खनेदइमखु । तुयू जलय् थुकीया
ज: खनीमखु । चान्हय् ख्युंसे च्वनी
बलय् जक खनेदइ । चान्हय् नं
तिमिला थी बलय् काचाक्क
खनीमखु । मिजला ज: पिहाँ वइ
थाय् सिमा बाय् मेगु छुकीया
किचलं दायाच्वंसा जक खनेदइ ।

गालं वइगु फसफरस
ल:ग्व:ा तज्याये थें जुया: फसय्
वनीगुलिं वं भचा च्वय् थ्यंका:
जक थुकिं पिहाँवइगु मिजला
बांलाक खनेदइ । मिजला फसय्
लाइबलय् छुं भचा भारा भार
जुइ । फ्वाललल् फ्वाललल्
वइगु तता:हाक: जूथें जुया: मिखा
तिरिमिरि धा:थें जुइ । थज्याबलय्
ज:ख:या छुं नं वस्तुया
आकृतियात मनूया आकृति थें
खनावइ । फ्वाललल् फ्वाललल्
वया: तता:हाक: जुयाव:गु
मिजलाया ज: सँ भ्यापा भ्यापा
च्वंगु थें च्वनी । थज्यागु मनूया
आकृति हे लाखय्या रुप थें
खनावइ । मिजला ल्हातिं
ज्वनात:गु बाय् छयनय् तयात:गु
थें च्वनावइ । थज्यागु आकृति
यात हे मिप्वा:लाखय् तायावइ ।
थज्यागु आकृति खुसिधिस:,
ध:सिथं सिथं, सुंसां दंगु ख्य:
थासय् अप्व: धयाथें खनेदइ ।

ल्हापा न्हापा सा, म्यय्,
फइ, च्वलय् खिचा आदि जीवन
सित धायेव ल्हायेगु चलन दु ।
थज्यापिं ल्हाइ बलय् अप्व:याना:
खुसि धिसलय्, ध:या सिथय् सुंसां
दंगु थासय् ल्हायेगु याइ । उकें
अप्व:याना: मिप्वा: लाखय् खने
दइगु नं थजयाथाय् हे जुइ ।

गालं फसफरस वइ बलय्
चा व फि फ्व:चाया: वये मालीगुलिं
भाक भुकं जुया:वइगु व ल:ग्व:ा

तज्याये थें जुया: जक फसय
वनीगुलिं मिजला पिहाँवइबलय् नं
भा: भा: दि दिउँ जक वइ । थथे
वइगु नं सकभनं छक्वलं मजुसे
पा: पा: जुया जक वइ । फसय्
खने दयाच्वंगु मिजलाय् फसफर
सया मात्रा फुतकि मिजला
तनावनी । छथाय् तनावसां मेथाय्
खनेदयावइ । उकें मिजला च्यात
सित, च्यात सित जुयाच्वनी ।
क्वचं फसफरस वया च्वंतले
थज्यागु क्रम जुया वच्वनी ।
वातावरणय् छुं कथंया पंग: वल
धायेवं गबलें गबलें फसफरस थहाँ
वयेगुली गडवड जुइय: । अथेजुल
धायेवं मिजला वयेगु दी बाय्
मिजलायात मिखां तिफ्याये मफये
य: । थज्याबलय् लाखय् अलप
जुल (सल) धायेव चलन दु ।

सीपिं जीवत गज्यागु कथं
ल्हानातल मिजला वइगु अवस्था
नं उकथं हे जुइ । हाक: चिंक
ल्हाकात:सा मिजला नं हाक:
चिंक हे वइ । गपाय् हाक:
ल्हानातल अपाय् हाक: हे वइ ।
थ्वयात हे लाखय्या लाग्ना धायेगु
याइ । मिजला पिहाँ वइबलय्
छथासं मेथाय् पालंपा: च्यात
सित जुया: वइगुलिं मिप्वा:
लाखय् न्यासि जुयाच्वंथें जुइ ।
भचा भचा जक ल्हानात:थाय्
मिजला बुलुहुँ जक वइ लाखय्
नं बुलुहुँ जक न्यासि वं थें जुइ ।
भचा अप्व: दुथाय् मिजला भचा
अप्व: वइ, लाखय् ब्वांब्वां वंथें
जुइ । यक्व हे दुथाय् जुल धायेवं
निम्ह निम्ह दुथें नं खनावइ ।

तत:गा:गु गा: खना: यक्व
छथासं ल्हानात:थाय् जुलकि
मिजला नं छथाय् हे यक्व वइ ।
थज्या:थाय् यक्व लाखय्त मुना:
तितिं न्ह्या: म्हिताच्वंथें जुइ ।
थज्या:गु लू अप्व: याना: सुंसां दंगु
ख्यलय् खनेदइ । भचा त:धना नं
सुंसां दंगु ख्यलय् छथासं अप्व:
थासय् ल्हानात:थाय् जुल धायेव
अप्व: थासय् थज्या:गु लू खनेदइ ।

क्वचं न्ह्याबलें निरन्तररुपं
फसफरस पिहाँ वयाच्वनीमख ।
थुकिया नं अवधि दइ । अवधि
फुना: फसफरस पिहाँ वयेगु दितकि
मिजला पिहाँ वइमखु । मिजला
पिहाँ मवलकि लाखय् नं पिहाँ वइगु
दी । थथे जुया: हे न्हापा न्हापा
लाखय् वइ धा:थाय् लिपा मवइगु
ख: । धाथें लाखय् हे दुगु ख:सा
न्ह्याबलें वयाच्वने मा:गु ख: । सीपिं
जीवत ल्हानात:थाय् मिप्वा: लाखय्
वइगु धयागु छुं दैवी शक्ति मखु,
थ्व अन्धविश्वासय् लिकुनाच्वंगु छगू
विज्ञान सम्मत खँ ख: ।

बिचा: हायेका

जन्म: वि.सं.
१९९६



मदुगु: वि.सं.
२०७३/८/९



मदुम्ह चक्रवती महर्जन



ज्यापु महागुथि किपू नगरसमितिया जिवंकाछि ज: व केन्दीय पार्षद रत्नमान महर्जनया मां चक्रवती महर्जन वंगु मंसिर ९ गते ७६ न्हयखुदँया बैशय आकाभाकां मदुगुलिं मदुम्हेसिया चित्त शान्ति जुया सुखावती भुवनय् वास लाय्मा धका: श्रद्धाञ्जली देछासैं थुगु दुःखया इलय् छँज:पिन्सं मनचिइ फयेमा धका: बिचा: हायेका च्वना ।

ज्यापु महागुथि

किपू नगर समिति

सु सु भष्म जुइ धाय्मफु



कवि राम महर्जन

की.न.पा. १६, नगाउँ
ए नेपा देया मू नेतात
थपिनी जक गुली नयगु
थपिनी समर्थकतयत नं छक
अवसर विइगु ज्या यायमाल ॥
गुलिं जनता काँग्रेस समर्थक
गुलिं एमाले समर्थक
गुलिं माओवादी समर्थक खसा
गुलिं मधेशी फोरमया समर्थक॥
गुलिं नेमकीपा समर्थक
गुलिं राष्ट्रिय नेपा पार्टीया समर्थक
गुलिं राप्रपा समर्थक खसा
गुलिं जनमोर्चा समर्थक ॥
आखिर छगु दलया समर्थकत ख
थुपी फुक नेपाया जनतात हे ख
विदेशी त मखु
जनताया समस्या न थुइके माल ॥

लजगा चुलाकेगु अवसर विउगु यासा

सकल दलया पालय सकले जनता त
उदार जुइखनी गु ख:
भच्चा न्हापा भच्चा लिपा ॥
नेतातयसं मस्वयकं जनताया ज्या हे दइमखु
ज्या मदुम बेरोजगार न्ह्याबलें
समस्यां ग्रस्त जुइका च्वन
बेरोजगारया न्ह्याबलें ल्हा हुसुलुं प्वा फुसुलुं ॥
न्त्योलं चायके हथाय जुइ धुकल
जनता धांलासा जीउपी
जनताया पीत्यागु प्वाथं वइगु ज्वालां
छनु सु सु भष्म जुइ धाय मफु ? ॥

Wanted

Motessori Trained
Teacher -- 1
Helper --1
Dance Teacher -1

Star Montessori Pre-School

Dhalpa, Kirtipur -5
Phone : 01 4331771

श्रद्धाया स्वां देछाया

जन्म:
वि.सं.१९९६



मदुगु:
२०७३/८/९



मदुम्ह चक्रवती महर्जन



जिमि मां चक्रवती महर्जन थ्व हे वंगु वि.सं. २०७३ साल मंसिर ९ गते विहिवार खुन्हु न्हयखुदँया बैसय् आकाभाकां मदुगुलिं वय्क: सुखावती भूवनय् वास लायेमा धका: कामना यानाच्वना ।

बिचा: हायेकूपिं

काय्/भौ -रत्न मान महर्जन/बसुन्धारा महर्जन

जिलाजं/ह्याय्-भगवान् महर्जन/पानमाया(रमा) महर्जन

जिलाजं/ह्याय् - केदार महर्जन/रमिता महर्जन

जिलाजं/ह्याय्- वद्वि महर्जन/रजनी महर्जन

जिलाजं/ह्याय् -दिपक महर्जन/रोशनी महर्जन

जिलाजं/ह्याय्- डा.सुरेन्द्र महर्जन /रश्मिला महर्जन

व छँ ज:पिं